

Odluka kojom se nalaže SDS-u Doboju da podnosi mjesečne izvještaje o svim finansijskim transakcijama

Koristeći se ovlašćenjima koja su visokom predstavniku data u članu V Aneksa 10. (Sporazum o implementaciji civilnog dijela Mirovnog ugovora) Općeg okvirnog sporazuma za mir u Bosni i Hercegovini, prema kojem je Visoki predstavnik konačni autoritet u zemlji u pogledu tumačenja gore navedenog Sporazuma o implementaciji civilnog dijela Mirovnog ugovora; i posebno uzevši u obzir član II 1. (d) istog Sporazuma prema kojem visoki predstavnik “pomaže, kada ocijeni da je to neophodno, u rješavanju svih problema koji se pojave u vezi sa implementacijom civilnog dijela Mirovnog ugovora”;

Pozivajući se na stav XII.2 Zaključaka Konferencije za implementaciju mira održane u Bonu 9. i 10. decembra 1997. godine, u kojem je Vijeće za implementaciju mira pozdravilo namjeru visokog predstavnika da iskoristi svoj konačni autoritet u zemlji u vezi sa tumačenjem Sporazuma o implementaciji civilnog dijela Mirovnog ugovora, kako bi pomogao u iznalaženju rješenja za probleme u skladu sa gore navedenim “donošenjem obavezujućih odluka, kada ocijeni da je to neophodno”, o određenim pitanjima, uključujući i (prema tački (c) stava XII .2) “mjere kojima se obezbjeđuje implementacija Mirovnog sporazuma na cijeloj teritoriji Bosne i Hercegovine i njenih entiteta”, koje “mogu uključivati preduzimanje mjera protiv lica koja obavljaju javne funkcije (...) za koje visoki predstavnik ustanovi da krše zakonske obaveze preuzete prema Mirovnom ugovoru ili uslove njegove primjene;

Svjesni potrebe da se spriječi finansiranje aktivnosti kojima se opstruira, ili koje predstavljaju prijetnju da opstruiraju proces provođenja mira koji se odvija pod okriljem Općeg okvirnog sporazuma za mir u Bosni i Hercegovini;

Konstatirajući da se Izbornim zakonom Bosne i Hercegovine daje obaveza predsjednicima političkih stranaka da podnesu izvještaj o tome da su aktivnosti političke stranke u skladu sa Opštim okvirnim sporazumom za mir u Bosni i Hercegovini;

Znajući da je Izbornim zakonom Bosne i Hercegovine i Zakonom o finansiranju političkih stranaka Bosne i Hercegovine uveden koncept transparentnosti finansiranja političkih stranaka s ciljem da se suzbije ukorijenjena korupcija u Bosni i Hercegovini zbog koje je ugroženo demokratsko upravljanje, rasipaju se javna sredstva i sprečava razvoj tržišne ekonomije;

Konstatirajući sa žaljenjem da izvjestan broj osoba optuženih po članu 19. Statuta Međunarodnog krivičnog tribunala za bivšu Jugoslaviju (u daljem tekstu: Statut) uspijeva da do danas izbjegne pravično krivično gonjenje i da navedeno izbjegavanje ne bi moglo biti moguće bez pomoći drugih osoba i subjekata, čime se vrši opstrukcija implementacije Općeg okvirnog sporazuma za mir u Bosni i Hercegovini;

Imajući u vidu činjenicu da je nekoliko članova Srpske demokratske stranke (u daljem tekstu: SDS) smijenio Visoki predstavnik zbog umiješanosti u aktivnosti štetne po stabilnost Bosne i Hercegovine i vladavinu zakona, od kojih neki, direktno ili indirektno, pružaju materijalnu pomoć i sredstva za preživljavanje jednom licu optuženom po navedenom članu 19, a to je g. Radovan Karadžić;

Vodeći računa o činjenici da je SDS osnovao optuženi ratni zločinac koji je i dalje na slobodi, te stoga SDS ima posebnu odgovornost da prekine svoje veze sa prošlošću, da u potpunosti sarađuje sa Međunarodnim tribunalom i da pomogne u

hapšenju i slanju navedenog optuženog u Hag;

Prisjećajući se teksta Odluke visokog predstavnika br. 221/04 kojom se blokiraju svi bankovni računi koje posjeduje, čiji je imalac, odnosno koji glase na ime SDS-a i kojom se od SDS-a zahtijeva da uspostavi jedan bankovni račun («Službeni glasnik BiH», br. 36/04) od 30. juna 2004. god. (u daljem tekstu: Odluka br. 221/04), u kojoj se naređuje između ostalog, da se svi računi koje posjeduje, čiji je imalac, odnosno koji glase na ime SDS-a blokiraju i da SDS uspostavi jedan bankovni račun u poslovnoj banci koja raspolaze odgovarajućom dozvolom u Bosni i Hercegovini;

Prisjećajući se takođe da, prema Odluci br. 221/04, sve finansijske transakcije koje prelaze iznos od 150 KM od strane ili u ime SDS -a vrše se posredstvom tog jednog računa uspostavljenog na osnovu spomenute odluke;

Imajući na umu nalaze izvještaja Poreske uprave Ministarstva finansija Republike Srpske od 1. jula 2005. god. (br. 01/0101/014-76/05) (u daljem tekstu: izvještaj Poreske uprave RS) prema kojima je SDS Doboj primio nekoliko uplata u iznosima većim od 150 KM;

Konstatirajući da je, na osnovu izvještaja Poreske uprave RS, sedamnaest (17) takvih uplata SDS Doboj primio i zadržao u periodu od 16. septembra 2004. god. i 22. septembra 2004. godine;

Prisjećajući se da rukovanje, primanje ili na drugi način sticanje sredstava putem finansijske transakcije čiji je iznos veći od 150 KM iz bilo kojeg izvora ili na bilo koji način osim preko jednog računa uspostavljenog Odlukom br. 221/04 predstavlja kršenje te odluke;

Uzevši u obzir te razmotrivši sva ovdje navedena pitanja, visoki predstavnik donosi sljedeću:

ODLUKU

kojom se nalaže SDS-u Doboj da podnosi mjesečne izvještaje o svim finansijskim transakcijama

Član 1.

SDS-u Doboj se nalaže da podnosi mjesečne finansijske izvještaje o svim svojim finansijskim transakcijama u skladu sa ovom odlukom. Prvi takav izvještaj će obuhvatiti sve finansijske transakcije u mjesecu septembru 2005. godine.

Svi izvještaji se podnose Ministarstvu finansija Republike Srpske i Izornoj komisiji Bosne i Hercegovine, uz kopiju Uredu visokog predstavnika, najkasnije petog dana svakog mjeseca za prethodni mjesec.

Član 2.

Finansijski izvještaji će sadržavati sljedeće informacije:

1. Opće podatke o SDS -u Doboj, uključujući naziv organizacione jedinice političke stranke kako je registrirana kod nadležnog suda, skraćeni naziv, sjedište, adresu, telefon, faks, e-mail adresu, identifikacioni broj, naziv suda kod kojeg je registriran, ukupan broj zaposlenih;
2. Ime, prezime i adresu lica, ili više njih, ovlaštenog za zastupanje SDS-a Doboj i njegovu funkciju u SDS-u;
3. Ime i prezime lica, ili više njih, u SDS-u Doboj, ovlaštenog za potpisivanje prenosa sa jednog računa na račune dobavljača, za primanje i raspolaganje sredstvima SDS-a sa jednog računa SDS-a, i za vršenje svih drugih finansijskih transakcija;
4. Sve prihode SDS-a Doboj, uključujući konkretne izvore navedenih prihoda;

5. Sve rashode SDS-a Doboj, uključujući, ali ne ograničavajući se na režijsko-administrativne troškove, troškove propagande, troškove za plate zaposlenih.

Svi finansijski izvještaji sadrže dokaz za svaku finansijsku transakciju koja se odnosi na prihode i rashode iz tačaka 4. i 5. stava 1. ovog člana.

Uz sve izvještaje prilaže se bankovni izvještaj za mjesec o kojem se izvještava, koji sadrži podatke o svim sredstvima datim SDS -u Doboj i sve plaćene rashode iz stava 2. ovog člana.

Član 3.

Predsjednik SDS -a Doboj potpisuje sve finansijske izvještaje koji se dostavljaju u skladu sa čl. 1. i 2. ove odluke. Predsjednik SDS -a Doboj smatra se odgovornim za tačnost podataka datih u izvještajima.

Član 4.

Odredbe Odluke br. 221/04, između ostalog, čl. 1, 3. i 7. te odluke, i dalje se primjenjuju.

Član 5.

Ova Odluka stupa na snagu odmah i odmah se objavljuje u "Službenom glasniku Bosne i Hercegovine" i "Službenom glasniku Republike Srpske".

Sarajevo, 22. septembar 2005.

Paddy Ashdown

Visoki predstavnik